

# БАЁННИНГ КЎЧИРМА НУСХАСИ

## Давлат харидлари соҳасидаги шикоятларни кўриб чиқиш бўйича комиссия йиғилишининг БАЁНИ

Тошкент шаҳри

2023 йил “28” феврал

**Раислик қилди:** Иқтисодиёт ва молия вазири ўринбосари  
– комиссия раиси - Г. Рахимова

**Қатнашдилар:** Давлат харидлари соҳасидаги шикоятларни кўриб  
чиқиш бўйича комиссия аъзолари

**Таклиф этилганлар:** “Баҳром Олим мангу” МЧЖ вакили

Давлат харидлари соҳасидаги шикоятларни кўриб чиқиш бўйича комиссия  
йиғилишининг қворуми – \_\_\_\_ %.

### КУН ТАРТИБИ

Давлат харидлари соҳасидаги шикоятларни кўриб чиқиш бўйича комиссия  
(кейинги ўринларда - Комиссия)га 2023 йил 31 январда келиб тушган “Баҳром Олим  
мангу” МЧЖнинг 7-сон мурожаатида кўтарилган масалалар муҳокамаси.

#### Кун тартибидаги масала юзасидан.

Комиссия раиси ўринбосари С. Назаров сўзга чиқиб, мурожаат муаллифи  
– “Баҳром Олим мангу” МЧЖ (кейинги ўринларда – Жамият)нинг мурожаатида  
кўтарилган масалалар билан йиғилиш иштирокчиларини таништирди.

Унга кўра, Жамиятнинг асосий фаолият тури ижтимоий объектларда қурилиш  
ишларини амалга ошириш эканлиги, 2013 йилдан буён давлат харидлари соҳасида  
харид қилиш тартиб-таомилларида иштирок этиб келаётганлиги;

Жиноят ишлари бўйича Пешку туманлараро судининг қарорига асосан Инсофсиз  
ижрочиларнинг ягона реестрига киритилганлиги ва шунга асосан қурилиш соҳасида  
ўтказиладиган танлов (тендер) савдоларидаги иштироки чекланганлиги;

Пешку туманлараро судининг 2021 йил 22 июндаги 1-2011-2101/30-сонли  
ажрими билан жиноят ишини тугатиш тўғрисида қарор қабул қилинганлиги;

Жамият ўзини Инсофсиз ижрочиларнинг ягона реестридан чиқарилишида  
амалий ёрдам берилиши баён қилинган.

Маълумот учун: Ўзбекистон Республикасининг “Давлат харидлари  
тўғрисида”ги Қонунининг 48-моддасига асосан, Инсофсиз ижрочиларнинг ягона  
реестри ваколатли орган томонидан шакллантириладиган рўйхатдан иборат бўлиб,  
унга суднинг қарорига кўра фирибгарлик, сохталаштириш ва коррупция билан боғлиқ  
жиноятларни содир этганликда **айбдор деб топилган** ижрочилар тўғрисидаги  
маълумотлар киритилиши белгиланган.

Бош прокуратура ҳузуридаги Иқтисодий жиноятларга қарши курашиш  
департаментининг вазирликка йўллаган 2022 йил 13 сентябрдаги 2/3-1982-22-сон хати  
орқали 2021 йил ва 2022 йилнинг 6 ойида давлат харидлари соҳасида тадбиркорлик  
субъектлари томонидан содир этилган жиноятлар аниқланганлиги ва уларнинг якуни

бўйича қабул қилинган қарорлар ҳақидаги маълумотлар иловага мувофиқ юборилган (*Жамият ушбу иловада мавжуд*).

Шуларга асосан, Комиссиянинг 2022 йил 26 сентябрдаги йиғилишида (7-сон баён) Жамиятни Инсофсиз ижрочиларнинг ягона реестрига киритиш тўғрисида қарор қабул қилинган.

Йиғилиш давомида мурожаатчи вакили томонидан такдим қилинган ҳужжатлар ўрганилганда, Пешку туманлараро судининг 2021 йил 22 июндаги 1-2011-2101/30-сонли ажрими билан мазкур жиноят ишини тугатиш тўғрисида қарор қабул қилинганлиги, жиноят оқибатида етказилган моддий зарар бартараф этилганлиги, фуқаровий даъвогарнинг бирор-бир даъвоси йўқлиги маълум бўлди.

### **Юқоридаги масалаларни кўриб чиқиб, Комиссия қарор қилади:**

Ўзбекистон Республикаси Жиноят-процессуал кодексининг 23-моддасида гумон қилинувчи, айбланувчи ёки судланувчи унинг жиноят содир этишда айбдорлиги қонунда назарда тутилган тартибда исботлангунга ва қонуний кучга кирган суд ҳукми билан аниқлангунга қадар айбсиз ҳисобланиши белгиланган.

Мазкур Кодекснинг 84-моддаси 5-қисмига мувофиқ, шахсга нисбатан айнан шу айблов бўйича ишни тугатиш ҳақида суднинг қонуний кучга кирган ажрими (қарори) ёки ваколатли мансабдор шахснинг жиноят иши қўзғатишни рад этиш ёхуд ишни тугатиш ҳақида бекор қилинмаган қарори бўлса, шахснинг жиноят содир этилишида айблилиги тўғрисидаги масалани ҳал қилмай туриб жиноят иши тугатилиши лозим.

Такдим қилинган ҳужжатларга ва белгиланган қонунчилик талабларига мувофиқ давлат харидлари электрон тизими операторига Жамиятни Инсофсиз ижрочиларнинг ягона реестридан чиқариш вазифаси юклатилсин.